

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## **ZAKLJUČAK**

o odbacivanju Prijave namjere koncentracije privrednog subjekta Veleprodajni centar trgovina na veliko i malo d.o.o., Sarajevo, Bosna i Hercegovina i privrednog subjekta VF Komerc d.o.o., Sarajevo, Bosna i Hercegovina

Sarajevo, septembar 2007. godine



Broj: 01-04-26-013-15 -II /07  
Sarajevo, 21. 09. 2007. godine

Na osnovu člana 42. stav (1) tačka g) a u vezi sa članom 12. i 14. Zakona o konkurenciji («Službeni glasnik BiH», broj 48/05) i člana 116. stav (2) Zakona o upravnom postupku («Službeni glasnik BiH», broj 29/02), po Prijavi namjere koncentracije privrednog subjekta Veleprodajni centar trgovina na veliko i malo d.o.o., Rajlovačka bb, 71000 Sarajevo, Bosna i Hercegovina, podnesenoj od strane ovlaštenog zastupnika, direktora Ervina Berbića, Konkurencijsko vijeće na 50 (pedestoj) sjednici održanoj dana 21.09.2007.godine, je donijelo

### **ZAKLJUČAK** **o odbacivanju Prijave namjere koncentracije**

Odbacuje se Prijava namjere koncentracije privrednog subjekta Veleprodajni centar trgovina na veliko i malo d.o.o., Rajlovačka bb, 71000 Sarajevo, Bosna i Hercegovina radi nepostojanja obaveze podnošenja Prijave od strane podnosioca Prijave, u smislu odredbi Zakona o konkurenciji.

### **O B R A Z L O Ž E N J E**

Dana 20.04.2007. godine Konkurencijsko vijeće je zaprimilo Prijavu namjere koncentracije (u daljnjem tekstu: Prijava) koju je podnio privredni subjekt Veleprodajni centar trgovina na veliko i malo d.o.o., Rajlovačka bb, Sarajevo (u daljem tekstu: Veleprodajni centar). Prijava je dopunjena dopisom dana 30.04.2007. godine.

U Prijavi Veleprodajni centar navodi da namjerava provesti koncentraciju koja će nastati na tržištu trgovine na malo i veliko mješovitom robom, prehrambenim proizvodima, pićem i proizvodima široke potrošnje za domaćinstvo u Bosni i Hercegovini uzimanjem u zakup osnovnih poslovnih prostora privrednog subjekta VF Komerc d.o.o., društvo za trgovinu na veliko i malo i posredništvo, Kurta Schorka 7, 71 000 Sarajevo, Bosna i Hercegovina (daljem tekstu VF).

Uvidom u dostavljenu Prijavu Konkurencijsko vijeće je utvrdilo da ista nije kompletna u smislu člana 30. Zakona o konkurenciji (u daljnjem tekstu: Zakon), te je u skladu sa članom 31. Zakona zatražilo dopunu (dana 08.05. 2007. godine broj: 01-04-26-013-2-II/07, dana 21.06. 2007. godine broj: 01-04-26-013-6-II/07.).

Podnosilac Prijave je u skladu sa zahtjevima Konkurencijskog vijeća dopunio Prijavu nedostajućom dokumentacijom (dana 31.05.2007. godine broj: 01-04-26-013-5-II/07, dana 02. 07.2007. godine broj: 01-04-26-013-7-II/07).

Nakon primljene tražene dokumentacije Konkurencijsko vijeće je utvrdilo da je Prijava kompletna i izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 26. jula 2007. godine broj: 01-04-26-013-8-II/07.

Kao pravni osnov koncentracije Veleprodajni centar je uz Prijavu priložio Ugovor o zakupu zaključen dana 12.04.2007. godine u Sarajevu sa privrednim subjektom VF pod brojem 3473-01/07. Ovim Ugovorom Veleprodajni centar uzima u zakup dio poslovnog prostora i to u dijelu koji se odnosi na maloprodaju hrane, pića i drugih potrepština, pripadajuća skladišta i kancelarije privrednog subjekta VF na lokaciji Pofalići, Općina Novo Sarajevo, Put života 12, koja je kao nekretnina upisana u zk. Uložak LIII/1194 k.o. Sarajevo.

Kako VF na teritoriji BiH ima više veleprodajnih i maloprodajnih objekata Veleprodajni centar sa VF zaključuje pojedinačne ugovore o zakupu za još 11 objekata i iste dostavlja dopunom Prijave dana 02.07.2007. godine.

Konkurencijsko vijeće je nakon uvida u Prijavu i priloženu dokumentaciju i analize istih utvrdilo sljedeće činjenice :

1. Privredni subjekt Velpro nije nezavisni privredni subjekt u smislu člana 12. Zakona jer:
  - Privredni subjekt Konzum trgovina na veliko i malo d.d. (u daljnjem tekstu: Konzum), Marijana Čavića 1a, 10000 Zagreb , Republika Hrvatska je osnivač i 100,0% vlasnik privrednog subjekta Velpro;
  - Privredni subjekt Agrokor d.d. Zagreb, Trg Dražena Petrovića 3 Republika Hrvatska (u daljnjem tekstu: Agrokor) je većinski vlasnik privrednog subjekta Konzum sa 71,62% ukupnih dionica;
2. Privredni subjekti Agrokor i VF su dana 28.03.2007 godine zaključili Okvirni ugovor o preuzimanju poslovanja i dugoročnom zakupu (u daljem tekstu: Okvirni ugovor). Ugovorne strane su ovim Ugovorom utvrdile model i uslove preuzimanja zakupa poslovnih i skladišnih prostora, prenosu i prodaji vozila, opreme i branda, rok trajanja zakupa i cijenu zakupnine po m2. Članom 4. ovog Ugovora je, između ostalog, utvrđeno da će zakupodavac zaključiti sa zakupcem odnosno društvom po njegovom nalogu ugovore o zakupu 14 poslovnih i skladišnih prostora, čiji popis se nalazi u prilogu Ugovora.

Imajući u vidu utvrđene činjenice Konkurencijsko vijeće je ocijenilo da su pojedinačni ugovori koje je Veleprodajni centar dostavio kao pravni osnov koncentracije samo realizacija dijela Okvirnog ugovora i prema tome u konkretnom slučaju ne postoji obaveza prijave namjere koncentracije od strane Podnosioca prijave u smislu Zakona jer se ne radi o koncentraciji nezavisnih privrednih subjekata. Shodno tome obaveza prijave namjere koncentracije je bila na privrednom subjektu Agrokor kao stvarnom učesniku koncentracije i to na osnovu zaključenog Okvirnog ugovora kao pravnog osnova koncentracije.

Na osnovu izloženog Konkurencijsko vijeće je odlučilo kao u dispozitivu ovog Zaključka.

#### **POUKA O PRAVNOM LIJEKU**

Protiv ovoga Zaključka nije dopuštena žalba. Nezadovoljna stranke može pokrenuti upravni spor pred Sudom Bosne i Hercegovine u roku od 30 (tridset) dana od dana prijema ovog Zaključka odnosno od dana njegove objave u «Službenom glasniku BiH».

Ovaj Zaključak bit će objavljen u «Službenom glasniku BiH», službenim glasilima entiteta i Brčko Distrikta Bosne i Hercegovine.

**Predsjednik**

**Sanja Božić**